

Wa  
789





AK.





Gedenck vnd Erinnerungs  
Predigt /

**V**on dem grau-  
samen Gewitter / vnd schreck-  
lichem Gewässer / darmit Thüringen  
heimgesuchet worden / am Sonnabend vor  
Trinitatis in der Nacht / war der 29. Maij,  
dieses instehenden 1613.

Jahrs /

Behalten /

Vnd nunmehr mit Particula-  
riteten vnd sonst in etwas ver-  
mehret / zu Jehna den 2. Junij.

Von

**J**OHANNE MAJORE,  
der h. Schrift Doct. vnd Professore,  
auch Pfarherrn vnd Superinten-  
denten daselbst.

Gedruckt zu Jehna /  
Ben Johann Weidnern.

Im 1613. Jahr.



Handwritten text at the top of the page, likely a title or header, appearing as "Gedacht und Einbildung".

Large, stylized handwritten text in the upper middle section, possibly a title or a decorative heading.

Several lines of smaller handwritten text below the large heading, possibly a preface or introductory text.







## TEXTUS.

**I**ch solte zwar / Geliebte vnd An-  
dächtige in Christo dem HERRN / zu diesem  
mal / vnd auff heutigen Predigttag / in vnser  
gewöhnlichen Mosaischen Lektion / fortfah-  
ren / vnd auffer derselben nichts anders noch  
newes vornehmen vnd tractiren: Aber weil  
der HERR vnser Gott / der vns lehret woz nützlich  
ist / vnd leitet vns auff den Weg den wir gehē / Es. 48. v. 17. am ver-  
schienenen Sonabend in der Nacht / mit einer zuvor vnerhörten Was-  
ser vnd Sündflut ein ding gethan in Israel / daß einem beyde Ohren  
gellen / der es höret / 1. Sam. 3. v. 11. So wollen wir auch einen unge-  
wöhnlichen Text vor die Hand nehmen / vnd hieraus Gottes Werk  
vnd Wunder behertzigen. Denselbigen lesen wir im Buch Hlob am  
38. c. da sich der HERR auß dem Wetter hören leset / vnd saget:

**W**er ist der / der so fehlet in des Weisheit /  
vnd redet so mit vnverstand? Gürte deine  
Lenden / wie ein Man / ich wil dich fragen /  
lehre mich. Bist du gewesen da der Schnee her  
kômpt? Oder hast du gesehen wo der Hagel her  
kômpt? Die ich habe verhalten bis auff die Zeit  
der Trübsal / vnd auff den Tag des Streits vnd  
Kriegs. Durch welche Weg theilet sich dz Liecht?  
Vnd auffhret der Ostwind auff Erden? Wer  
hat dem Plazregen seinen Lauff außgetheilet /

A ij

vnd



vnd den Weg dem Blitzen vnd Donner? Daß  
es regnet auff's Land/da niemand ist/in der Wü-  
sten/da kein Mensch ist. Das erfüllet die Einö-  
den vnd Wildnis/vnd machet dz Gras wechset.  
Wer ist des Regens Vater? Wer hat die Trop-  
fen des Thawes gezeuget? Aus wes Leib ist das  
Eis gegangen? Vnd wer hat den Reiffen vnter  
dem Himmel gezeuget? Daß das Wasser ver-  
borgen wird wie vnter Steinen / vnd die Tiesse  
oben gestehet. Kanst du die Bande der sieben  
Sterne zusammen binden? Oder das Band des  
Orion auflösen? Kanst du den Morgenstern  
herfür bringen zu seiner Zeit? Oder den Wagen  
am Himmel vber seine Kinder führen? Weißest  
du/ wie der Himmel zu regieren ist? Oder kanst  
du ihn meistern auff Erden? Kanst du deinen  
Donner in der Wolcken hoch her führen? Oder  
wirdt dich die menge des Wassers verdecken?  
Kanst du die Blitzen auslassen/ daß sie hinsah-  
ren / vnd sprechen: Hie sind wir. Wer gibt  
Weisheit ins Verborgene? Wer gibt verstendige  
Gedanken? Wer ist so weise/ der die Wolcken  
erzehlen kündte? Wer kan die Wasserschleuche  
am Himmel verstopffen? Wenn der Staub be-  
gossen wird / daß er zu Hauffe läuft / vnd die  
Klöße an einander kleben.

Erklä-



## Erklärung.

**A**lle diese Wort / so viel derselben auff <sup>Exordium</sup>  
vnd nacheinander an jertzo ewer Liebe sein vorgelesen <sup>ab auctore</sup>  
worden / hat der Herrscher vnd Richter aller Welt / <sup>horum ver-</sup>  
der Himmel vnd Erden besitzt / <sup>borum.</sup> Gen. 14. v. 19. in eigener  
Person selber geredet / zum Hiob dem grossen Mär-  
tyrer vnd Creutzträger / ihn hiemit zu examiniren / vnd von seinem  
Sinn abzuhalten / dadurch er sich versündigtet / vnd thörllich wider  
Gott geredet / vnd gethan hatte. Denn es waren seine drey Freun- <sup>Occasio eo-</sup>  
de / ein jeglicher auß seinem Ort / kommen / in dem grossen Unglück <sup>rundem.</sup>  
das ihn betroffen / ihn zu besuchen vnd zu trösten. Da sie nun ange-  
fangen mit ihm zu redē / gerahen sie an einander mit einer scharffen  
vnd schweren Disputation / ob Hiob den vielfeltigen grossen Jam-  
mer / so ihn betreten / mit seinen Sünden verdienet / vnd ob der hei-  
lige vnd allein mechtige Gott auch Ursach gnugsam hette / daß Er  
diesen Man / der schlecht vnd gerecht war / so hefftig angrieffe. In  
welchem Disputat wie offtermals in dergleichen Streit zu gesche-  
hen pfleget / auff einem Theil / so wol als auff dem andern / viel ver-  
weisliches vnd vngeschicktes Dinges mit vnter gelauffen / bevorab  
in dem / daß man den Abgrund der Weisheit Gottes erschöpffen /  
die Tieffe seiner Gerichte ergründen / vnd alle seine Wege vnd An-  
schläge ermessen vnd außdecken / vnd also hiermit Gott selber zur  
Schule führen / vnd rechtfertigen wollen. Welchem irrigem vnd <sup>Finis.</sup>  
verwirretem Handel / vnd daraus erwachsenen inconuenientien  
abzuhelffen / gibt Gott / der allein weise ist / Rom. 16. v. 27. letztlich einen  
Scheideman / vnd fellet das Vrtheil mehr auff Hiobs Seiten / den  
seiner Freunde / fast des Ausschlages vnd Schlusses / dergleichen  
auch Paulus nach vollführter seiner Disputation / von hindanse-  
tzung der Juden / vnd Beruf der Heyden / machet / Rom. 11. v. 33. O  
welch ein Tieffe des Reichthums / beyde der Weisheit vnd Erkent-  
nus Gottes? Wie gar unbegreiflich sind seine Gerichte / vnd uner-  
forschlich seine Wege? Den wer hat des HERRN Sinn erkandt?  
Oder wer ist sein Rathgeber gewesen? Oder wer hat jm etwas zuvor  
gegeben / das ihm werde wieder vergolten? Vnd Sprach zieleet auch  
auff diesen Zweck / G. 1. v. 4. Wer hat Gott je gelehret / was er machen  
A 3 solle?



*Summa  
& scopus.*

solle? Denn seine Weisheit ist vor allen dingen. Ingleichen Es. 40.  
v. 14. Wen fragt der HERR vmb Raht/der ihm Verstand gebe/ vnd  
lehre ihn den Weg des Rechtes? Ist demnach dieses der vorhaben-  
den Wort eigentliche Meynung / wenn man von Gott vnd seinem  
Thun/so er an den Menschen / wie auch an andern Creaturen sehen  
lest/wolte vrtheilen/vnd vnverweislich reden? So müsse man nicht  
die elende Vernunft des Menschen zur Magisterin vnd Lehrmei-  
sterin aufstellen/ noch sich mit Fleisch vnd Blut befragen/denn da-  
durch kömpt man je lenger je weiter auff frembde Irrwege / fehret  
entweder zu hoch oder zu tieff/ Rom. 10. v. 7 sondern man muß sich in  
kindlicher Einfalt vnd Demut halten an den Willen Gottes/den er  
vns in seinem Wort offenbaret/darinnen wir finden/ dz vnbegreiff-  
lich sey / wie Gott regiere / Ps. 147. vnd seyn vns viel grösser Werck  
verborgen/denn wir sehen vnd erkennen/ wir treffen das kaum/ das  
auff Erden ist/ vnd erfinden schwerlich/ das vnter Handen ist/ wer  
wil denn erforschen/das im Himmel ist. Der sterblichen Menschen

*Propositio.*

Gedanken seynd mislich/vnd vnser Anschläge seynd fehrllich/Sap. 9.  
v. 14. Solche Meynung Gottes aus dem abgelesenen Text mit meh-  
rern einzunehmen: Wollen wir die Fragen/ so Gott dem Job auff-  
gegeben / ruminiren, vnd in h. Andacht kurtzlich durchwandern/  
Auch fürs andere/den fürnehmsten Nutz vnd Gebrauch anzeigen/  
vnd hiernechst/auff vns vnd jetzigen Zustand die application ma-  
chen. Der König der Ehren/ so da donnert/ vnd seine Stimme hören  
lesset auff den Wassern/Ps. 29. v. 3. der gebe seinē Donner krafft/Ps. 68.  
v. 34. vmb vnser HERRN vnd Heilands Jesu Christi willen/Amen.

*ἐξερ-  
σια. ab  
hypothesi  
transit.  
Ad thesin.*

**W**As der Lehrer von Gott in diese Welt gesendet / zu seinem  
Nachschüler Nicodemo saget / Joh. 3. v. 8. Der Wind bläset  
wo er wil/vnd du hörest sein sausen wol/aber du weist nicht  
von wannen er kömmt/vnd wohin er fehret: Eben solches können  
wir auch von andern / vnd allermeist denen dingen sagen/ die sich an  
vnd vnter dem Himmel / oder in der Luft/ entweder mit den Ster-  
nen oder mit Dünsten/Wolcken/Nebeln/Gewitter vnd dergleichen  
meteoris begeben vnd gesehen werden. Denn ob wol die fleissigen  
Naturkündiger/denen Gott Weisheit vnd Verstand gegeben/ daß  
sie wissen die Krafft der Elementen/die Art der zahmen vnd wilden  
Thiere/ vnd wie das Jahr herumb lauffet / vnd der Wind stürmet/  
Sap. 7.

*Contra  
astrologorū  
opiniones.*



Sap. 7. v. 20. sich hoch bemühen / natürliche Ursach am Himmel vnd  
Gestirn zu erkündigen vnd vorzulegen / warumb es heute trübe /  
morgen schön Wetter geben / jetzo kalt / bald warm sein müsse / Item:  
woher Land vnd Leuten / Guts vnd Böses / Schaden vnd Heil / Krieg  
vnd Friede / Thewrung vnd wolfeihle Zeiten / Wachsthumb der  
Früchte vnd verderben entstehe / so wollen doch ihre vorgeschützte  
rationes in der Prob nicht bestehen / noch in Erfahrung den Stich  
halten. Vnd können zwar die Sterngucker vnd Meister des Him-  
mels / wie sie Es. 47. v. 13. genent werden / den alten Bund / den Gott  
mit Samen vnd Ernde / mit Frost vnd Hitze / Sommer vnd Win-  
ter / Tag vnd Nacht gemacht / wissen / vnd sich auff solche Ordnun-  
gen verstehen / Gen. 9. v. 22. Jer. 31. v. 36. cap. 33. v. 21. auch daher Zeiten /  
Tage vnd Jahr / Gen. 1. v. 14. bis auff den letzten Scrupel eigentlich  
außrechnen / welcher Ursachen halben sie billich in allen Ehren vnd  
Wirden zu halten. Aber daß sie vber diß zukünfftige Dinge / von  
Glück oder Vnglück / auff vnd abnehmen / wol oder vbel gehen / vie-  
ler oder weniger Menschen / in gleichen den Zustand Land vnd Leut /  
Städte vnd Dörffer / Herrn vnd Vnterthanen zuvor erlernen / vnd  
als Himmelspropheten ankündigen / das wil zu viel sein / vnd all zu  
hoch anlauffen. Vnd wirdt von Gott selber widersprochen / Es. 8.  
v. 19. Wenn sie aber zu euch sagen: Ihr müßet die Warsager vnd  
Zeichendeuter fragen / die da schwetzen vnd disputiren / ( so spricht )  
Soll nicht ein Volck seinen Gott fragen ? Ingleichen / Es. 41. v. 22.  
Lasset sie herzu treten / vnd vns verkündigen / was künfftig ist / Ver-  
kündiget vns / vnd weissaget etwas zuvor / lasset vns mit vnsern Her-  
tzen darauff achten vnd merckē / wie es hernach gehen soll / Oder las-  
set vns doch hören / was zukünfftig ist / verkündiget vns was hernach  
kommen wird / so wollen wir mercken / daß ihr Götter send. Trotz /  
thut Guts oder Schaden / so wollen wir davon reden / vnd mit ein-  
ander schawen. Nochmehr / Es. 43. v. 9. Lasset alle Heyden zusammen  
kommen zu hauff / vnd sich die Bölcker versamlen / welcher ist vnter  
ihnen / der solchs verkündigen möge / vnd vns hören lassen vorhin /  
was geschehen soll ? Last sie ihr Zeugen darstellen vnd beweisen / so  
wird mans hören / vnd sagen : Es ist die Wahrheit. Letzlich Es. 47. v. 13.  
Laß her treten / vnd dir helffen die Meister des Himmelslauff / vnd  
Sterngucker / die nach den Monden rechnen / was vber dich kommen  
werde.

*Quæ vera  
et proban-  
de quoad  
temporum  
distinctio-  
nes.*

*Incerta et  
vana quoad  
futurorum  
eventuum  
prædictio-  
nes.*

I.



11. werde. Vnd was hilfft es/das man ein Unglück zuvor weiß / wann  
 man ihm nicht kan begegnen/noch dasselbige abwenden? Ad legem  
 & testimonium, &c. Nach dem Gesetz vnd Zeugnis/ Es. 8. v. 20.  
 Nemlich Gottes Wort das ewig bleibet/ Es. 40. v. 8. vnd nimmer feh-  
 len kan/noch vergehen/ Lu. 21. v. 33. ist das rechte kräftige Mittel /  
 dadurch der heilige Geist Buß vnd Besserung in den Hertzen der  
 Menschen erwecken wil/ Luc. 24. v. 48. Rom. 1. v. 16. Es. 55. v. 11. vnd nicht  
 das Wort der Warsager / welches zehen mal fehlet / ehe es einmal  
 eintrifft/ nach dem Ausspruch Davids/Ps. 116. v. 11. Alle Menschen  
 111. seynd Lügner. Vnd welche das Rescriptum Gottes / verstehe sein  
 heiliges geoffenbartes Wort hindan setzen/vnd wollen auffer / vor  
 oder neben demselben/ den heimlichen verborgenen Gott/ Es. 45. v. 15.  
 in seinem Rahstüblein umbstören/ seinen Sinn vnd Vorhaben zu  
 erfahren/vnd ires Gefallens zu deuten vnd auszulegen/ denen wird  
 hier in vnserm Text eben scharff zugeredet / vnd gesaget: Wer ist  
 der / der so fehlet in der Weisheit/ vnd redet so mit Vnverstand?  
 Gürtle deine Lenden/ wie ein Man/ Ich wil dich fragen/lehre mich.  
 Vnd daß wir dieses mal des Anfangs der Welt/vnd Ursprungs der  
 Creaturen / so wol als anderer Sachen mehr geschweigen / welche  
 vnter die Heimlichkeiten Gottes gehören/ auch viel zu alt vnd fern/  
 zu hoch vnd tieff seyn / als daß sie ein Mensch erlangen vnd errei-  
 chen könnte/darvon göttliche Majestet allernechst vor vnseren abge-  
 lesenen Worten discourirt, vnd allein bey denen dingen mit vnse-  
 rer consideration bleiben / welche sich theils perpetuiren, theils  
 viel vnd oft geschehen/ So fraget sich / Num ingressus es prom-  
 ptuaria nivis, & penu grandinis vidisti? Weißest du wo Gott seine  
 Kasten vnd Schatzkammer habe / darauß er den Schnee vnd Hagel  
 nimpt/so oft er denselben auff die Erden schüttet/damit die Welt zu  
 straffen/vnd den Gottlosen eine Schlacht zu liefern? Weißest du wo-  
 her das grausame Blitzen vnd schießen der Stralen entstehet/ weiß  
 der Ostwind ein Wetter zusammen treibet? woher vnd wohin sich die  
 Platzregen sampt dem Gewitter zertheilen / vnd wer dem Donner/  
 so es einschlegt/ den Weg zeige? Es gerahte gleich vber ein wüsten  
 Wald/da kein Mensch wohnet/oder vber das Erdreich/so da durstig  
 ist / vnd lechzet nach einem Regen? Wer ist des Regens Vater?  
 (so fern Nebel vnd Wolcken für seine Mutter zu achten) wer zeuget  
 die

Periphrasis  
 textus.



die Tropffen des Thawes? wo ist die Mutter / die das Eyß gebietet /  
vnd wo seynd die Eltern / von welchen der Reiff geboren wird? wie  
kômpt es / daß das Wasser / vnd offtermals die allergrösten Tiefsen  
oben zufrieren / vnd gleichsam einen Harnisch anlegen / Syr. 43. daß  
das Wasser vnter dem Eiß / wie vnter einem harten Steinfels / sich  
verbirget / vñ hinfließt? so wenig als ein Mensch sich auff seine eigne  
Empfengnis vnd Geburt verstehet / so wenig kan er auch diese ding  
ergründen / so jetzo erzehlet worden. Wunderbarlich sind Gottes  
Werck / vnd das erkenet meine Seele wol / spricht David Ps. 139. v. 14.  
Vnd daß wir weiter gehen / Wer kan den Sommer vnd Herbst / Lentz /  
vnd Winter zuwegen bringen / vnd jedem Quartal seine vnterschied-  
ne Witterung schaffen? Wer regieret das Siebengestirn? Wer or-  
denet den Jacobsstab? Wer quartiret die zwölff Zeichen des schlim-  
men Circels / genant Zodiacus? Wer lencket als ein Schirmeister  
den Wagen am Himmel? Kan auch jemand den Lauff der beweg-  
lichen vnd unbeweglichen Sternen / endern / hemmen vnd auffhal-  
ten? Oder den motum coeli, seines Gefallens anordnen / vnd gleich  
wie hienieden auff Erden / die Empter vnd Dienste der himlischen  
Lichter auftheilen? wer darff sich vnterfangen den Wolcken zu ge-  
bieten / daß sie den Regen behalten / oder von sich geben? wer kan zu-  
wegen bringen / daß auff sein Beheis der Blitz herfür breche / vñnd  
auffwarte? wer ist so weise vnd verstendig / daß er könne die Wolcken  
vber einander auffthörmeln / vnd als ein volles Faß oder Braupot-  
tich anzapffen / daß wasser heraus fließt / vnd wiederumb den Zapf-  
fen vorstecken / vnd zuspünden / daß die wassergöffe auffhören / da-  
mit nicht aller Staub vnd Erdt zu Schlamm werde. Ja wol (sagt  
Gott) ein Mensch sey so weise vnd klug / so hoch vnd mechtig / als er  
immer seyn könne / so wird er doch diese vorgelegte Fragen nimmer-  
mehr mit Grund vnd Bestand auflösen / viel weniger so weit kom-  
men / daß er diese himlische vñnd vnterhimlische werck moderire  
oder mit seinem gebieten vnd verbieten / im geringsten etwas ver-  
möge: sondern diese vnd andere Posten mehr / gehören ad regalia  
& reservata DEI, von welchen wir Moses wort brauchen können /  
Deut. 22. v. 34. Ist solches nicht bey mir verborgen / vnd versiegelt in  
meinen Schätzen? Vns gebühret nicht zu wissen Zeit vnd Stun-  
de / welche der Vater seiner Macht vorbehalten / Act. 1. v. 3.

B

Lernen



Ufus.  
ἐνδιδα-  
σκαλία.  
Ps. 104. v. 3.

Lernen bestimach hieraus/ daß Gott allein des Himmels Meister  
vnd Herr sey/ vnd solches nit allein aus vnd nach der Schöpffung/  
sondern auch wegen der Erhaltung vnd Regierung. Den gleich wie  
er den Himmel anfangs gewelbet/ vnd an dessen Feste die Sonne  
vnd Gestirn gesezt/ daß sie Licht vnd Finsternis scheiden sollen/

Also muß ihm auch alles zu gebot stehen/ vnd auffwarten/ weß  
vnd warzu/ auch wohin/ vnd wider wen er eins oder das ander brau-  
chen vnd haben wil/ es sey Sonn oder Mond/ Ps. 121. v. 6. Wolcken  
oder Schnee/ Regen oder Hagel/ Schlossen oder Reiff/ Plitzen oder  
Donner/ Feuer oder Dampff/ Sturmwind oder Wasser/ wie solchs  
beydes die Sprüche/ so wol als die Exempel v. Schrift außweisen/  
Es. 49. v. 26. Hebt ewre Augen auff in die höhe/ vnd sehet/ wer hat sol-  
che ding geschaffen? vnd führt ihr Heer bey der Zahl herauß? der sie  
alle mit Namen rufft/ Ps. 135. v. 6. Der HERR thut alles/ was er wil/  
im Himmel/ auff Erden/ im Meer/ vnd in allen Tieffen/ der die Wol-  
cken lest auffgehen/ vom Ende der Erden/ der die Plitzen sampt den  
Regen macht/ der den Wind auß heimlichen Orttern kommen lest/  
Ps. 147. v. 4. Er zehlet die Sternen/ vnd nennet sie alle mit Nahmen/  
Ps. 74. v. 16. Tag vnd Nacht ist dein/ du machst daß beyde Sonn vnd  
Gestirn ihren gewissen Lauff habē/ Ps. 104. v. 19. Gen. 8. v. 22. Ps. 147. v. 16.  
Er gibt Schnee wie Wolle/ er strewet Reiffen wie Aschen/ er wirfft  
seine Schlossen wie Bissen/ wer kan bleiben für seinem Frost? Er  
spricht/ so zerscheltzet es/ er lest seinen Wind wehen/ so thawet es/  
Ps. 148. v. 8. Feuer/ Hagel/ Schnee/ Dampff/ Sturmwinde richten  
sein Wort auß/ Syr. 43. Er macht durch seine Krafft die Wolcken dick/  
daß Hagel heraus fallen/ sein Donner erschreckt die Erde/ vnd Berge  
zittern vor ihm. Eben dieses bezeugen auch die Exempel/ so in gros-  
ser anzahl verhanden: Als Pharao die Kinder Israhel nit wolte zie-  
hen lassen/ vñ sein Hertz je mehr vnd mehr verstockte/ ließ der HERR  
donnern vnd hageln/ daß das Fehr auff die Erden schoß/ Ex. 9. v. 23.  
Vnd welches das Buch der Weisheit mit fleis notirt/ war das das  
aller wunderlichste/ das Feuer am meisten im Wasser brante/ wel-  
ches doch alles ausleschet/ c. 16. v. 17. Als Josua die 5. Könige der Amo-  
riter in die Flucht schlug/ ließ der HERR einen grossen Hagel vom  
Himmel auff sie fallen/ daß ihr viel mehr starben vom Hagel/ denn  
die Kinder Israhel mit dem Schwert erwürgeten/ Jos. 10. v. 11. Sa-  
muel



muel brachte durch sein Gebet zuwegen / daß es zweymal donnern  
vnd wittern muste / einmal mit Schaden der Philister / das ander  
mal zum Schrecken des Volcks Israel / 1. Sam. 7. v. 10. vnd 12. v. 18.  
Vnd was mag wol das Krauschen auff den Wipffeln der Maulber-  
bäumen / anders gewesen seyn / denn vnfers lieben Gottes Donner-  
stimme vnd Brausen / dadurch er die Philister für David erschreckt  
vnd geschlagen / 2. Sam. 5. v. 24. Des ist nicht new / daß Gott regnen  
lest vber die Gottlosen / Pütz / Feuer vnd Schwefel / vnd gibt ihnen  
ein Wetter zu Lohn / Ps. 11. v. 6. wie an den Sodomitern vnd andern  
Feinden Gottes ergangen / Darvon der 18. Ps. v. 8. Die Erde bebete /  
vnd ward beweget / vnd die Grundfeste der Berge regeten sich / vnd  
bebeten / da er zornig ward. Dampff gieng auff von seiner Nasen /  
vnd verzehrend Feuer von seinem Munde / daß es davon blitzet.  
Er neigete den Himmel / vnd fuhr herab / vnd tuncfel war vnter  
seinen Füßen. Vnd fuhr auff dem Cherub / vnd flog daher / er schwe-  
bet auff den Fittigen des Windes. Sein Gezelt vmb ihn her war  
finster / vnd schwarzze dicke Wolcken / darinnen er verborgen war.  
Vom Glantz für ihm trenneten sich die Wolcken / mit Hagel vnd  
Blitzen. Vnd der H E R R donnerte im Himmel / vnd der Höhest  
ließ seinen Donner auß mit Hagel vnd Blitzen. Er schoß seine  
Stral / vnd zerstreuet sie / Er ließ sehr blitzten vnd schrecket sie. Da  
sah man Wassergösse / vnd des Erdbodens Grund ward auffge-  
deckt / H E R R von deinem Schelten / von dem Arthem vnd schnau-  
ben deiner Nasen. Als Jonas der Prophet für dem H E R R  
flohe / vnd sich auffß Wasser begab / ließ der H E R R einen grossen  
Wind auffß Meer kommen / vnd erhob sich ein groß Ungewitter  
auff dem Meer / vnd bekennet Jonas selber / daß solch groß Unge-  
witter vmb seinet willen vber die andern komen sey / c. 1. v. 4. vnd 12.  
Wann denn der H E R R / wie auß angezogenen Sprüchen vnd Ex-  
empeln vberflüssig erscheinet / alle ding im Himmel vnd auff Erden  
ordnet / dirigirt vnd schaffet / vnd ihme hierinnen kein Mensch einre-  
den noch einrahten / viel weniger die Hand mit anlegen vnd helffen  
kan noch darff. Als / muß falsch vnd vnrecht seyn / wenn man saget /  
es geschehe diß oder jenes ohn gefehr / gleich wie sich Sap. 2. v. 2. die  
nasse Kotte hören lest / Ohn gefehr seynd wir geboren / vnd fahren  
wieder dahin / als weren wir nie gewesen.



Oder es fliesse alles her aus einem vnvermeidlichen Nohtzwang/  
 vnd könne anders nicht gehen/ denn wie es gehet: sondern es stehet  
 alles in Gottes Hand / vnd ohne dessen willen vnd verfehung kan  
 nichts geschehen. Von ihme/ durch ihn/ vnd in ihm seynd alle ding/  
*Rom. 11. v. 35.* Wie könnte etwas bleiben/wenn du nicht woltest/ oder  
 wie könnte erhalten werden/das du nicht geruffen hettest/*Sap. 11. v. 25.*  
 Ich bin der HERR/vnd keiner mehr/der ich das Liecht mache/vnd  
 schaffe die Finsternis / der ich Friede gebe/ vnd schaffe das Ubel/  
*Es. 45. v. 7.* Er machet alle seine werck/wie es ihm gefellet/ *Syr. 33. v. 13.*  
 Er ruffet der Dürre/ daß der Himmel seinen Tau vnd Regen vber  
 vns verhalten muß/*Hag. 1. v. 10. & 11.* vnd feuchtet auch hinwiderumb  
 die Berge von oben her/ *Pf. 104. v. 13.*

*Εὐαγγελίου*  
*Ad agno-*  
*scendam sa-*  
*pientiam*

DEI.

Omnipoten  
 tiam.

Erweist hiemit erstlich seine Weisheit / so da reichet von einem  
 Ende zum andern/ gewaltiglich / vnd regieret alles wol/ *Sap. 1. v. 8.*  
*Sapientia eius non est numerus.* Es ist vnbegreiflich wie er regie-  
 ret/ *Pf. 140. v. 7.* Er hat alle seine Werck weislich geordnet/ *Pf. 104.*  
*v. 24.* Er beweiset seine weisheit herrlich/ vnd sihet/ zu welcher Zeit  
 ein jegliches geschehen werde/ *Syr. 43. v. 19.*

Darnach lest er auch hiemit sehen/ seine Majestet vnd Allmacht/  
 wie hiervon David redet/ *Pf. 29. v. 4.* VOX DOMINI in virtute, Die  
 Stimme des HERRN gehet mit Macht/ die Stim des HERRN  
 gehet herlich / der Gott der Ehren donnert/ *v. 3.* Vnd Elihu saget/  
*c. 36. v. 27.* Er machet das wasser zu kleinen Tropfen/ vnd treibet sei-  
 ne wolcken zusammen zum Regen/ daß die wolcken fließen/ vnd trief-  
 fen sehr auff die Menschen/ wenn er fürnimmet die wolcken auszu-  
 breiten/ wie sein hoch Gezelt/ Sihe / so breitet er auß seinen Blitz  
 vber dieselbige/ vnd bedeckt alle Ende des Meers/ denn damit schre-  
 cket er die Leute/ vnd gibt doch Speise die Fülle/ Er deckt den Blitz  
 wie mit Händen / vnd heist es doch wieder kommen/ Davon zeuget  
 sein Geselle / nemlich des Donners Zorn in wolcken. Drumb zit-  
 tern die Seulen des Himmels/ vnd entsetzen sich für seinem Schel-  
 ten/ *Joh. 26. v. 11.* wer wil den Donner seiner Macht verstehen/ *v. 14.*  
 Vnd *Jer. 10. v. 13. & c. 51. v. 16.* wenn er donnert / so ist des Wassers die  
 Menge vnter dem Himmel/ vnd zeucht die Nebel auff vom Ende der  
 Erden/ er macht die blitzten im Regen/ vnd lesset den wind kommen  
 aus heimlichen Orten. Dir HERR ist niemand gleich/ Du bist groß/  
 vnd



vnd dein Nahme ist groß/ vnd kanst es mit der That beweisen / wer  
solte dich nicht fürchten / du König der Heyden? Dir solte man ja  
gehorschen.

Er beweiset auch vber diß mit dem Regenwetter / seine Güte vnd *Bonitatem*  
Trew / gegen die / so seinen Bund vnd Zeugnis halten / vnd geben  
acht auff seiner Hände Werck / *Deut. 27. v. 12.* Welches Jeremias Gott  
den *HERRN* erinnert / *C. 14. v. 22.* Es ist doch ja vnter der Heyden  
Götzen keiner der Regen könt geben / so kan der Himmel auch nicht  
regnen / Du bist doch ja der *HERR* vnser Gott / auff den wir hoffen /  
denn du kanst solches alles thun. Vnd Paulus prediget eben dieses /  
denen zu Lystra / *Act. 14. v. 17.* Gott der gemacht hat Himmel vnd Er-  
den / vnd das Meer / vnd alles was drinnen ist / hat sich nit vnbezeigt  
gelassen / sondern vns viel Guts gethan / vnd vom Himmel Regen  
vnd fruchtbare Zeitung geben / vnd vnser Hertzen erfüllet mit Spei-  
se vnd Frewden / *Job. 37. v. 12.* Er fehret die wolcken wohin er wil / daß  
sie schaffen alles was er ihnen gebeut auff dem Erdboden / es sey vber  
ein Geschlecht / oder vber ein Land / so man ihn barmhertzig findet.  
Vnd hieher gehört / was im 65. so wol als im 104. Psalm weitlauf-  
tiger erzehlet wird. Wenn man aber Gott nicht erkennen wil / noch  
fürchten / der vns Frühregen vnd Spatregen gibt / zu rechter Zeit /  
vnd die Ernde trewlich vnd jährlich behütet / *Jer. 5. v. 25.* so nimpt *Justiciā &*  
er seinen Segen wieder zu sich / lest den Himmel der vber vnserem *judiciū*  
Haupt ist / vnd die Erde vnter vns eisern werden / *Deut. 28. v. 23.* gibt  
entweder Staub vnd Aschen für Regen / oder rüstet seine Creaturen  
zum Streit vnd Verderben wider die Gottlosen / wie solchs nach *Cum ergo*  
folgende Sprüche bezeugen vñ aussagen / *Job. 37. v. 6.* Er spricht zum *impios.*  
platzregen / so ist er da mit macht. Alle Menschen hat er in der Hand /  
als beschlossen / daß die Leute lernen / was er thun kan. Sprach am  
40. v. 35. Feuer / Hagel / Hunger / Tod / solches alles ist zur Rache  
geschaffen / die wilden Thier / Scorpion / Schlangen vnd Schwert /  
seynd auch zur Rache geschaffen / zu verderben die Gottlosen : Mit  
Frewden thun sie seinen Befehl / vnd seynd bereit / wo er ihr bedarff  
auff Erden / vnd wenn das Stündlein kömpt / lassen sie nicht abe.  
*Pf. 148. v. 8.* Feuer / Hagel / Schnee / Dampff vnd Sturmwinde rich-  
ten sein Wort aus / *Sap. 5. v. 21.* Er wird den strengen Zorn wetze zum  
Schwert / vnd die Welt wird mit ihm zum Streit ausziehen / wider  
die



die Unweisen/die Geschosß der Blitzen werden gleich zutreffen/vnd  
werden auß den Wolcken / als von einem hart gespanneten Bogen  
fahren zum Ziel / vnd wird dicker Hagel fallen / auß dem Zorn der  
Donnerschläge: So wird auch des Meers Wasser wider sie wüten/  
vnd die ströme werden sich mit einander hefftig ergiessen / vnd wird  
auch ein starcker Wind sich wider sie legen / vnd wird sie wie Wü-  
bel zerstreuen. Vnd 16. c. v. 24. Die Creatur / so dir / als dem Schöpf-  
fer dienet / ist hefftig zur Plage / vber die Vngerechten / vnd thut ge-  
mach zur Wolthat vber die / so dir trawen. In vnserm Text stehet /  
daß Gott den Hagel verhalte / bis auff die Zeit der Trübsal / vnd auff  
den Tag des streits vnd Kriegs. Denn weñ man nicht bedenckt / was  
zu vnserm Friede dienet / vud lest die Zeit der gnedigen Heimsuchung  
füruber rauschen / Luc. 19. v. 42. So begibt sich der HERR der Heer-  
scharen in Harnisch / vnd gebeut allen Creaturen auff / daß sie wider  
seine Feinde / vnd vngheorsame Rebellen / oder abtrünnige Kind zu  
Felde ziehen / vnd dermassen haushalten / daß weder Kopff noch  
Schwantz vberbleibet / vnd beydes Aß vnd Strumpff abgehawen  
wird auff einen Tag / Es. 9. v. 1. Denn wie wir zu anderer Zeit hören /  
so hat er zwenerley Buspredigren / damit er der Welt zuspricht: Die  
eine bestehet im Wort / die ander im Werck / jene gehet vor / diese fol-  
get nach: Inmassen an der erstē Welt / an Sodoma vnd Gomorra /  
an Jerusale / an Pharao / an den Babyloniern / Ninivitern vñ andern  
Völckern zu sehen / denen Gott bedenckzeit gnugsam gegeben / ehe er  
mit ihnen den gar auß gemacht. Welches dz Buch der Weisheit rüh-  
met / c. 12. v. 10. Du richtest sie mit der weile / vnd lieffest ihnen Raum  
zur Busse / 2. Chron. 36. v. 15. Gleich wie ein Vater seine Kinder erstlich  
mit Worten straffet / vnd darnach die Rute brauchet / weñ die Wort  
nichts helffen noch gelten wollen / Also thut auch der jenige / welcher  
der rechte Vater ist vber alles was da Kinder heist / im Himmel vnd  
auff Erden / Eph. 3. v. 15. nemlich / er ist ein rechter Richter / vñ ein Gott  
der täglich dräwet / wil man sich nicht bekeren / so hat er sein Schwert  
gewerzet / vnd seinen Bogen gespannet / vnd zieleet / vnd hat darauff  
gelegt tödliche Geschosß / seine Pfeile hat er zugericht zu verderben:  
Ps. 7. v. 12. Je lenger er inhelt mit der Straffe / je schwerer er nachdrü-  
cket. Vnd prediget nicht mehr mit Worten vnd durch menschliche  
Stimme / sondern mit Donner / Fehr / Hagel / Vngewitter / Sturm-  
winde



Winde vnd Sündfluten/ auff daß die Welt sehen solle/ das Urtheil  
das er hat gehen lassen/ vnd seine Hand die er angeleget hat/ vnd je-  
derman erfahre/ daß er der HERR sey/ Ez. 39. v. 21. der heilige vnd ge-  
rechte in Israel/ der alle ding recht regieret/ vnd achtets seiner Ma-  
jestet nicht gemäß jemand zu verdammen/ der die Straffe nicht ver-  
dienet hat/ Sap. 12. v. 15. Doch müssen in gemeinen Landstraffen auch  
die Frommen mit herhalten/ vnd offtermals am meisten einbüßen/  
wie denn Gott gemeiniglich den Anfang zu plagen machet an der  
Stad/ die nach seinem Namen genennet/ Jer. 25. v. 29. Vnd wie Pe-  
trus saget 1. Pet. 4. v. 17. So ist es Zeit das anfahe das Gerichte am  
Hause Gottes/ vnd wenn Gott befihlet seinen Männern / durch die  
Stad zu gehen/ vnd drein zu schmeissen/ so müssen sie an seinem Hei-  
lichumb anfahren/ Ez. 9. v. 6. Denn er findet auch an seinen Boten  
Thorheit/ vnd vnter seinen Knechten ist keiner ohn tadel/ Hiob 4. v. 18.  
Darumb züchtiget vnd richtet er sie / daß sie sich nit vnschuldig hal-  
ten/ Es. 27. v. 10. Jer. 30. v. 11. & 47. v. 28. Vnd so wir vns selber richteten/  
so würden wir nicht gerichtet/ wenn wir aber gerichtet werden / so  
werden wir vom HERRN gezüchtiget/ auff daß wir nicht sampt der  
Welt verdammet werden/ 1. Cor. 11. v. 32. Davon redet auch die Weis-  
heit Gottes/ mit denckwürdigen Worten/ c. 12. v. 18. Du gewaltiger  
Herrscher richtest mit lindigkeit / vnd regierest vns mit viel verschö-  
nen/ vñ gibst damit zu verstehen / dz wir sollen guter Hofnung seyn/  
daß du wollest Busse für die Sünde annehmen/ vnd züchtigest vns/  
daß wir deiner Güte mit fleiß warnehmen/ vnd ob wir gericht wür-  
den/ daß wir doch auff deine Barmhertzigkeit trawen sollen.

*Tum post.*

Welchs alles wir nit allein in gemein vns müssen gesagt sein lassen/  
Sondern auch insonderheit auff vns vnd jetzigen vnsern Zustand  
accommodiren. Denn vns allen miteinander vnvergessen/ was am  
Sonabend in der Nacht geschehen/ was etliche stunden lang für ein  
stetig Donnern/ vnd vnauffhörlich Blitzen gewesen/ von 7. bis nach  
12. da sich ansehen ließ/ als wen die Welt vntergehen/ vnd die Berge  
mitten ins Meer sincken wolten/ Ps. 46. v. 3. so grausam wüet vnd  
waltet das wild Wasser/ oder wie voriger Psalm redet/ Das Meer/  
das auch die Berge von seinem Vngestümb hetten einfallen mögen:  
Vnd giengen die Element durch einander / vnd was auff dem Lan-  
de zu seyn pflegte / das war im Wasser / vnd was im Wasser zu seyn  
pflegte/ gieng auff dem Lande/ Sap. 19. v. 17.

*applicatio  
ad presen-  
tia.*

Vnd



Vnd dieses ist nicht allein allhier bey vns/vnd in den angrentzenden Thälern/sondern auch in andern/von vns entlegenenOrtern. Den in einer Nacht/vnd wie der laut gehet/ fast zu gleicher Stunde / ist einerley Donnern/ Wittern vnd Regen gewesen / in Städten vnd Dörffern/ vber die acht Meilwegs in der Breite/ vnd vber 10. nach der Länge. Ja es wird geschrieben/ daß nicht allein diß schreckliche Gewitter vber gantz Thüringen/von der Sala an/biß an den Hartz gestanden / sondern zugleich auch etliche fürnehmeOrter in Sachsen berühret / vnd wird die Zeit je lenger je mehr bringen.

Was für grausam vnd zuvor vnerhört Gewässer ist erfolgt? An manchem Ort ist die Elbe in 10. 12. Ellen hoch vber ihren Strom gestiegen. Was für Schaden/ vnd leider bey vielen/ vnwiderbringlichen Schaden hat dieses Gewässer gethan? an Menschen vnd Viehe/ an Schaffen/ Kühen/ Ochsen/ Pferden/ an Eckern/ Gärten vnd Wiesen/ an Wonhäusern/ Kellern/ Mühlen/ Ställen/ Schewren/ vnd andern Gebäuden/ an Mauern vnd Wänden/ an fruchtbaren vnd andern Bäumen/ an dem Graß vnd Früchten auff dem Felde/ an Getrânck vnd Bier in den Kellern. Das Land war vor dieser Wasserflut wie ein Lustgarte / aber nach derselben / ist es wie eine wüste Einöde/ Joel. 2. v. 3. An allen Orten werden täglich mehr ertrunckene Menschen gefunden.

Zu Weimar sind allein 65. Menschen/ 25. Pferde/ 176. Stück Vieh ertruncken/ 44. Wonhäuser vnd Schewren hinweg gerissen worden/ zu Mellingen sind verdorben 22. Menschen/ 36. Häuser/ zu Kromsdorff stehn noch die wenigsten Häuser/ die meisten hat das Wasser/ wie auch zu Eberstet/ vnd andern Orten mitgenommen: Zu Kosla sind etliche 100. Schafe / zu Mattstett 25. Personen / zu Eberstet 23. zu Niedertrebra 19. zu Sulza auch etlich vnd 20. Menschen im Wasser blieben. In gleichen zu Leutra 10. Zu Maue



Maue 20. zu Ammerbach eins/ zu Krauthelm  
hinder dem Eittersberge 16. Personen/ vnd 40.  
Wohnhäuser / zu grossen Brembach 39. Men-  
schen/90. Häuser (vnd etwas drüber) zu kleiner  
Brembach 25. Personen vntergangen. Ohne  
was geschehen an andern Orten / als zu Rein-  
stadt / Gumperda / vnd im selbigen Kalischen  
Grunde/ zu Altenberga vnd Altendorff/ zu Böt-  
tern/ Sindersted/ Magdala/ zu Capellendorff/  
Sulzbach/ Herresen/ Apolda. Zu Gotha/ vnd  
sonst hin vnd wieder hats grausame Schlossen  
geworffen / vnd in vielen Fluren das Winterge-  
treidig weggeschlagen: Mühlhausen/ Langensal-  
za/ Zimmern/ haben auch ihr Theil nicht mit ge-  
ringem Schaden empfunden. Was die Unstrut  
vnd die Lossa gethan / welche beyde Wasser sich  
gewaltig ergossen/ das wird man künfftig erfah-  
ren: Vnd dieses ist alles in einer Nacht gesche-  
hen.

Aber

Quis cladem illius noctis, quis funera fando *En. 2.*  
Explicit, aut possit lachrymis æquare labores?

Was für ein Jammer muß es gewesen seyn/ weñ die Eltern ihre  
Kinder/ der Man sein Weib / der Bruder seine Schwester / vnd ein  
Freund den andern/ hat sehen im Wasser zappeln/ vñ hören schreien  
vnd ruffen/ vnd hat ihnen doch nicht helfen/ noch bespringen kön-  
nen/ sondern neben vnd mit ihnen verderben müssen? Was für ein  
Spiegel vnd Jammerspectacul ist es / wenn man hier vnd dort sie-  
het die Häuser verwüstet/ die Gärten verödet/ das Feld verschlem-  
met/ die Saat verschwenmet/ vnd die Todten an Bfer liegen/ oder

E

auch



auch wol an den Bäumen hangen? Ach der HERR hat gethan/was er fürhatte/ er hat sein Wort erfüllet / das er lengst zuvor geboten hatte / er hat ohne Barmhertzigkeit zerstöret / *Thren. 2. v. 17.* Er hat vns voll Jammers gemacht / am Tage seines grimmigen Zorns / *Thr. I. v. 12.* Wie lang/wie viel/wie oft haben die Boten des Friedes gewinselt vnd jederman zur Busse geruffen? Was vor vielfeltige Postboten hat Gott voran geschicket? Wie lang ist es/ daß erstlich zu Eunitz auff einmal vier Menschen / vnd hernacher auch bey vns zu Jehna eben so viel ertruncken / da sich die Saal in etwas ergossen? Was ließ sich nach Martini abgewichenen Jahrs für ein greulicher Wind hören/der Häuser vnd Wälde entblößet? hat vns Gott nicht zwey Jahr auff einander müßige Jäne gegeben/ vnd Mangel am Brot an vielen Orten? hat er nicht Pestilentz vnter vns geschickt/ vnd viel junge Manschaft durchs Schwert bey so langwirigē Türckenkrieg getödtet? hat er nit Städte vnd Dörffer umbgekehret/wie Sodoma vñ Gomorra/daß sie worden sind wie ein brand? Aber wer hat sich daran gekehret vnd bekehret? wer hat sich gebessert? wer ist frömmier worden? Noch bekehret ihr euch nicht zu mir/ spricht der HERR/ *Amos 4.* Wolan so tretet nun her / daß ich mit euch rede für dem HERRN/ vber alle Wolthat/ die er an euch vnd ewren Vätern gethan/ *1. Sam. 12. v. 7.* Vnd vber alle Vbelthat/ damit ihr Gott erzürnet. Gott hat sein Feuer vnd Herd bisher vnter vns gehabt / vnd diese Stad/ gleich wie Capernaum / bis an den Himmel erhoben/ *Matt. 11. v. 23.* Er hat fest gemacht die Kiegel vnserer Thor/ vnd vnserer Kinder drinnen gesegnet/ Er hat vnsern Grantzten Friede geschaffet/ vnd vns gesetiget mit dem besten Weitzen/ *Pf. 147. v. 13.* Die Wohnungen in der Wüsten sind fett gewesen/ daß sie getroffen/ die Hügel lustig/ die Anger voll Schafe/ vñ die Awen dick mit Korn/ *Pf. 65. v. 13.* Vnd nach dem viel Völcker sitzen im Finsternis vnd Schatten des Todes / *Luc. 1.* hat er vns gezeiget sein Wort / vnd vns lassen wissen seine Sitten vnd Recht/ *Pf. 147. v. 27.* vnd vns gesegnet mit allerley geistlichen Segen in himlischen Gütern/ durch Christum/ nach dem Reichthumb seiner Gnad/ welch vns reichlich widerfaren ist/ durch allerley Weisheit vnd Klugheit / vnd hat vns wissen lassen das Geheimnis seines Willens nach seinem wolgefallen/ *Ephes. 1. v. 8.* Aber wie haben wir vns hiergegen verhalten? Lasset vns forschen vnd suchen vnser Wesen/ *Thren. 3. v. 40.* Gebt



Gebt Gott die Ehre/vnd gebt ihm das Lob/vnd saget an/was ihr  
gethan habt? *Jos. 7. v. 19.* Was kan für eine Sünde wider die erste vnd  
ander Tafel genennet werden/die man nicht solte vnter vns gehört  
habē? was für fluchen vnd schwerē/zaubern/gottslestern/verachten  
göttliches Worts vnd Ordnung/Vngehorsam wider geistliche vnd  
weltliche Eltern/ist im schwang gangen? wie viel Ehebruch/Hure-  
rey/Mord vñ Todschlag seynd begangen/die nicht allein vngestraft  
blieben/sondern die auch noch von geldsüchtigen Advocaten beschö-  
net/vertheidiget/entschuldiget/vnd so hoch getrieben worden/das  
das Recht in Vermut verkehret/vnd die Gerechtigkeit zu boden ge-  
stossen/ *Amos. 5. v. 7.* das auß Liecht Finsternis/vnd auß Finsternis  
Liecht/ auß sawer süsse/vnd aus süsse sawer gemacht/vnd das Recht  
in Vnrecht verwandelt wird/ *Es. 5. v. 20.* Denn der Herr hat Vrsach  
zu schelten die im Lande wohnen. Denn es ist keine Treu/kein Lieb/  
kein Wort Gottes im Lande/sondern Gottslestern/lügen/morden/  
stelen vnd ehebrechen/hat vberhand genommen/vnd kömpt eine  
Blutschuld nach der andern. Darumb muß das Land jämmerlich  
stehen/vnd allen Einwohnern vbel gehen/denn auch die Thier auff  
dem Feld/vnd die Vogel vnter dem Himmel/vnd die Fisch im Meer/  
weggerafft werden/ *Hos. 4. v. 1.* Aber wer gleubts/das Gott so sehr  
zürnet/vnd wer fürcht sich für seinem Grim/*Pf. 90.* Wer gleubt vnser  
Predigt/vnd wem ist der Arm des HERRN offenbart/ *Es. 53.* War-  
lich das Volck ist müde sich zum HERRN zu kehren/vnd wie man  
ihnen predigt/so richt sich keiner auff/ *Hos. 11. v. 7.* Man ist nit allein  
dem gram der im Thor strafft/vnd helt den für ein Grewel der heil-  
sam lehret/ *Amos 5. v. 10.* Sondern des HERRN Wort ist vns zum  
Hohn vnd Spott worden teglich/ *Jer. 20. v. 9.* vnd Ezechiel hat müs-  
sen noch heut bey Tage (oder vielleicht bey Nacht) ein Liedlein seyn/  
das man gerne gesungen vnd gespiellet/ *Ez. 33. v. 32.* vnd gesagt/gebent  
hin/gebent her/harre hie/harre da/hie ein wenig/da ein wenig/ *Es.*  
*28. v. 10.* ohne was von heimlichen stummen Sünden geschehen/so  
schendlich zu sagen/vnd von Blutstürtzung/so grosses theils vnges-  
trafft/vnd derwegen dz Land niemals versönt worden/ *Num. 35. v. 33.*  
Stehet vns doch der Spiegel göttlichs Zorns für Augen/vnd der  
Stanck von den ertrunckenen geht vns in die Nasen/gleichwol fert  
sich niemand dran/da ist keiner der in sich schläge/dem seine bosheit  
leid were/vnd sprech/was mach ich doch/ *Jer. 8. v. 6.*      C 2    Ja



Ja das noch mehr vnd erger ist / eben in der Nacht / da sich Gott  
 hören lassen im Wetter / haben sich Belials Kinder hören lassen mit  
 tolliren / schreyen vnd jauchzen / anders nit / als wenn sie Gott trö-  
 tzen / vnd den Himmel stürmen wolten. Vnd ist des wüsten wilden  
 Wesens noch kein Ende noch auffhören / man jauchzet mit Pauken  
 vnd Harffen / vnd ist frölich mit Pfeiffen / *Job. 21. v. 12.* Die verschonet  
 vnd vnbeschädiget blieben / bekümmern sich wenig vmb den Schaden  
 Joseph / haben mit andern kein Mitleiden / rauben vnd stelen / zur  
 Rechten vnd Lincken / wo sie nur etwas bekommen können / vnd ach-  
 ten sich fern vom Unglück / gleich als hetten sie mit dem Tode einen  
 Bund / vnd mit der Hell ein Verstand gemacht / das wenn eine Flut  
 daher gehe / solche sie nit treffen könne / *Es. 28. v. 15.* Was wil nun letz-  
 lich darauß werden? Solte sie Gott vmb solches nicht heimsuchen /  
 vnd solte seine Seele sich nicht rechnen an solchem Volck / wie diß ist?  
*Jer. 5. v. 7.* Des ist zubeforgen diese vnerhörte Wasserfluten sein nicht  
 allein Straffen der begangenen Sünden / sondern porrendirn noch  
 ein größers so dahinden. Entweder den allgemeinen letzten Vnter-  
 gang der Welt / dessen Anzeig auch das Brausen des Meers vnd der  
 Wasserwellen Christus setzt / *Luc. 21. v. 25.* Oder ein ander Straff / so  
 vber die Einwohner des Landes kommen soll. Denn das Sünden-  
 Maß ist voll / & *completæ sunt iniquitates Amorrhæorum*, Gott  
 kan lenger nicht schonen / sondern muß drein sehen / vnd das Böse  
 weg thun von seinen Augen: Der Sünden dieses Volcks sind zu  
 viel / vnd bleiben verstockt in ihrem Vngehorsam / wie soll ich die  
 denn gnedig seyn / spricht der HERR / *Jer. 5. v. 7.* *Animi indocti er-  
 raverunt:* Die thörichten Leute fehlen / welche die Gerichte Got-  
 tes nicht achten / *Sap. 7. v. 1.* werden dahin gegeben in einen verkehr-  
 ten Sinn / *Rom. 1. v. 28.* vnd gehet ihnen wie den Söhnen Eli / von  
 denen geschrieben stehet / *1. Sam. 2. v. 25.* Sie gehorchten des Vaters  
 Stimme nicht / denn der HERR hatte willens sie zu tödten. Ich  
 mercke wol / spricht dort der Prophet zu dem Könige Amasia / *2.*  
*Chron. 25. v. 16.* daß Gott sich berahthen hat / dich zu verderben / weil  
 du solchs gethan hast / vnd gehorchest meinem Raht nicht.

Iratus ad poenam si quos DEUS trahit,  
 Auferre mentem talibus primùm solet,

Cali-



Caliginemque offundit, ut ruant suas  
Furenter in clades, sibi quas noxiis  
Accersierunt ultrò consiliis malis.

So viel vns zu Jehna betrifft/ hat zwar die Leuter/ welche dieser Stad von Alters her/ ein groß Unglück dreyet/ sich dermassen ergossen/dergleichen kein Man gedencet/ also daß sie grosse mechtige Bawhölzger auffgehoben / mit geführet / zerbrochen/ vnd schwere Lastwägen fortgetrieben/ vnd zerrissen/ auch an Häusern/ Wasser- röhren vnd Wändē zimliche Risse gethan/aber doch ist kein Mensch umbkommen/ vnd ausser dreyen Stücken / auch kein Viehe: Da doch dieser tieff gelegener Ort/ viel mehr denn andere/ sich Wassers halben zubefahren. Was ist die Ursach? vnd wem wollen wir es zumessen? Misericordiae DOMINI quod non consumpti sumus: Die Güte des HERRN ist/ daß wir nicht gar aus seynd/ Thren. 3. v. 22. Warlich/ warlich/ wenn vns der HERR Zebaoth nicht hette lassen ein wenig (vom heiligen Samen) vberbleiben/ so weren wir wie Sodoma vnd gleich wie Gomorrha/ Es. 1. v. 9. Rom. 9. v. 29. Jetzo hat Gott vnser verschonet / vnd an vns ein Beyspiel seiner gnädigen Hülffe sehen lassen / wie er denn auch an vielen andern Orten / die Leute wunderbarer vnd vbernatürlicher Weise auff den Bäumen/Dächern/vnd sonst erhalten/oder auß dem Wasser/ darauff sie sehr weit/wie die Enten/geschwommen/wiederumb errettet/vnd sie auß iren Engsten geführet/ zu welchen der 107. Ps. v. 31. sagt/Die sollen dem HERRN dancken vmb seine Güte vnd seine Wunder/die er an den Menschenkindern thut: Aber sein Zorn lest noch nicht ab/ vnd seine Hand ist noch ausgerect? Es. 9. v. 17. Quod differtur, non aufertur: Geborget/ ist nicht geschencet: Er kan vns noch allezeit finden/je lenger je schrecklicher: Ich werde ihre Sünde wol heimsuchen/ wenn meine Zeit kömpt heimzusuchen/ Exod. 32. v. 34.

Weil denn diesem also / vnd vns Gott mit dem Garaus dreyet/ *Conclusio.*  
so schicke dich Israel/vnd begegne deinem Gott/ Amos 4. v. 13. Denn sihe/er ist/der die Berge machet/den Wind schaffet/ vnd zeigt dem Menschen/ was er reden soll/ Er machet die Morgenröte/ vnd die Finsternis/er tritt auff die Höhen der Erden / er heist HERR Gott Zebaoth. Bessere dich Jerusalem/ehe sich das Hertz Gottes von dir wende / vnd er dich zu m wüsten Lande mache / darinnen niemand wohne/ Jer. 6. v. 8.




Gott hat dich lange Zeit gewarnet durchs Wort/Er hat dich auch  
numehr gewarnet mit dem schrecklichen Zornspiegel / so für Augen  
schwebet. Es ist manch frommes Mutterkind in dem Wasser vmb-  
kommen / das nicht gewust / vnterscheid / was Recht oder Linc ist /  
Jon. 4. v. 11. vnd das nur die helffte vnserer Sünden gethan / Ezech.  
16. v. 57. so aber zu erst an solchen / was wils für ein Ende werden mit  
denen / die dem Evangelio nicht gläuben? Vnd so der Gerecht kaum  
erhalten wird / wo wil der Gottlose vnd Sünder erscheinen? 1. Pet.  
4. v. 18. Sihe die jenigen / so es nicht verschuldet hatten / den Kelch  
zu trincken / haben ihn müssen trincken / vnd du solst vngestraftt blei-  
ben? Du solt nicht vngestraftt bleiben / sondern du must auch trin-  
cken / Jer. 49. v. 12. oder meynet ihr / daß die allein seynd Sünder vnd  
schuldig gewesen / für andern Menschen / weil sie das erlitten ha-  
ben? Ich sage nein / sondern so ihr euch nicht bessert / werdet ihr alle  
auch also vmbkommen / spricht Christus Luc. 13. v. 5. Darumb Ihr  
M. G. vber welchen ist der gute Geist des HERRN / demüti-  
get euch für dem Herrscher aller Welt / der da donnert im Himm-  
el / von dessen Schelten die Wasser fliehen / Ps. 104. v. 7. Suchet den  
HERRN weil er zu finden ist / rufft ihn an / weil er nahe ist / der  
Gottlose lasse von seinem Wege / vnd der Belthäter seine Gedan-  
cken / vnd bekehr sich zum HERRN / Es. 55. v. 6. Er ist gnädig / barm-  
hertzig / geduldig / vnd von grosser Güte / vnd rewet ihn bald der  
Straffe. Wer weis / es mag ihn wieder gerewen / vnd einen Segen  
hinter sich lassen / Joel. 2. v. 13. & 14. Fürchtet den HERRN ihr seine  
Heiligen / Ps. 34. v. 10. Vnd betet mit David: Ach HERR straff vns  
nicht in deinem Zorn / vnd züchtige vns nicht in deinem Grim / Ps.  
38. v. 2. mit Jeremia c. 31. v. 18. Bekehr mich du / so werde ich bekehrt /  
denn du bist mein Gott / da ich bekehrt ward / thet ich Busse / denn  
nach dem ich gewitziget bin / schlage ich mich auff die Hüffte.

O bone DEUS, hîc ure, hîc seca, hîc punge, hîc tunde,  
modò in æternum parce. Sollß ja so seyn / daß Straff vnd Pein /  
auff Sünde folgen müssen / so fahr hie fort / vnd schone dort / vnd  
laß mich ja wol büffen.

Nun wolan / Der HERR hats gegeben / der HERR hats  
genommen / Der Nahme des HERRN sey gelobet / heut vnd in alle  
Ewigkeit / Amen / Amen.





**A**ch Gott vnd HERR / Wie groß vnd schwer /  
    Seynd mein begangne Sünden /  
Da ist niemad / der helffen kan /  
    Auff dieser Welt zu finden.  
Lieff ich gleich weit / zu solcher Zeit /  
    Bis an der Werlet Ende /  
Vnd wolt loß sein / des Creutzes mein /  
    Würd ich doch solchs nicht wenden.

Zu dir flieh ich / Verstos mich nicht /  
    Wie ich hab wol verdienet /  
Ach Gott zürn nicht / geh nicht ins Gericht /  
    Dein Sohn hat mich versühnet.

Solls ja so seyn / daß Straff vnd Pein /  
    Auff Sünde folgen müssen :  
So fahr hier fort / vnd schone dort /  
    Vnd laß mich ja wol büßen.

Gib HERR Gedult / vergiß der Schuld /  
    Verley ein ghorsam Hertze /  
Laß mich nur nicht / Wies wol geschicht /  
    Mein Heil murrend verschertzen.  
Handel mit mir / wie es dünckt dir /  
    Nach deiner Gnad wil ichs leiden /  
Laß mich nur nicht / dort Ewiglich /  
    Von dir seyn abgescheiden.





Ma 7 87 01

Faint, illegible text, possibly bleed-through from the reverse side of the page.

Faint, illegible text, possibly bleed-through from the reverse side of the page.

Faint, illegible text, possibly bleed-through from the reverse side of the page.



Faint handwritten text or signature at the bottom left.

M.C.





**ULB Halle**

3

004 967 550









AK. 121, 3.



JO  
Der S  
a  
Bnt  
rite  
sam  
lichen  
heim  
Tri

JO  
Der S  
a

JO  
Der S  
a




L=  
f=  
en  
r

a=

E,  
re,

Wa  
781



Inches 1 2 3 4 5 6 7 8  
Centimetres 1 2 3 4 5 6 7 8 9 10 11 12 13 14 15 16 17 18 19

**Kodak**  
LICENSED PRODUCT  
3/Color Black

**KODAK Color Control Patches**  
© The Tiffen Company, 2000

Blue Cyan Green Yellow Red Magenta White

